

MOLAETSA OA KHOPOTSO EA TSOALO (KERESEMESE)
OA MOHLOMPHEHI TONA-KHOLO

Sechaba sa heso,

Kea le lumelisa sechaba, ke ntse ke re ho lona: lumelang! Re le sechaba sa Bokreste, re mathuleng a ho hopola ka thabo le teboho e khōlō ruri tsoalo ea Morena le Mopholosi oa rona, Jesu Krete. Ruri re leboha Mohau oa Molimo Ntate, mohau oo moroki e mong a reng “ke koeetsa e kaakang ’na haesale o mphihlela ke maketse feela” sefela 342. Monongoaha ke lemo sa 2016 “Lentsoe le ne le etsoe nama, ’me la aha har’a rona le tletse mohau le ’nete, ’me re bohile khanya ea lona, e kang khanya ea Mora a ’notsi ea tsoang ho Ntate” (Johanne 1:14). Athe ho rona Basotho lemo sena ke sa 183 baruti ba pele ba ile ba fihla ho Moshoeshoe, Thaba-Bosiu, ho bolela Evangeli ea Khotso, Khotso ea Jesu.

Ho feta moo, monongoaha re le Basotho re ketekile Jubile ea boipuso ba “Lesotho, fatše la bontat’a rona, Har’a mafatše le letle ke lona”, joaloka ha Pina ea Bochaba ba rona e bolela. Joaloka ha bohle re tla hopola re nkile monyetla oa Jubile ena ho ikhopotsa hore “Kaofela re Chabana sa Khomo”! Ereka joale re fihlile mafelong a lemo sena sa Jubile ea boipuso ba Lesotho ke hantle ho lekola le ho lemoha tsela eo re e tsamaileng re le sechaba leetong la boipuso.

Re phaka re eelloa hore lipolotiking le pusong leeto la rona le mekhahlelo e latelang:

- a) 1965 – 1970: Puso ea Sechaba ka Sechaba ketapeleng ea Tona-kholo Sekhonyana Maseribane le Leabua Jonathan ea BNP;

- b) 1970 – 1986: Puso ea qomatsi le bompoli ba Morena Leabua le BNP, ho sa tšoaroe likhetho, ho bile ho fanyehiloe Molao oa Motheo oa naha;
- c) 1986 – 1993: Puso ea Sesole tlas’a Major General Metsing Lekhanya (1986 – 1989) le Major General Phisoane Ramaema (1989 – 1993);
- d) 1993 – 1998: Puso ea Sechaba ka Sechaba ketapeleng ea Tona-Kholo Ntšu Mokhehle le BCP tlas’a Molao oa Motheo o Mocha;
- e) 1998 – 2012: Puso ea Sechaba ka Sechaba ka likhetho tse akaretsang ka 1998, 2002, 2007 le 2012 ketapeleng ea Tona-Kholo Pakalitha Mosisili le LCD;
- f) 2012 – 2015: Puso ea Letsema ketapeleng ea Tona-Kholo Motsoahae Thabane le ABC, LCD le BNP;
- g) 2015 – ho fihlela joale: Puso ea Letšoele le Beta Poho ketapeleng ea Tona-Kholo Pakalitha Mosisili le DC, LCD, PFD, MFP, BCP, NIP le LPC.

Sechaba sa heso, mefuta ena ea puso ka lemo tse 50 tsa pele tsa boipuso ke sesupo sa boima ba leeto leo re le tsamaileng re le sechaba Lesothong le ipusang. Ka baka leo ke nka monyetla ona ho le mema bohle ho khetha ka ’nete eohle tsela eo Lesotho le tlang ho e nka ha le simolla lemo tse ling tse 50 tso le kenang ho tsona.

Maoba mona ka la 5 Tšitoe re bile ’mokeng o mane holong ea liboka ea ’Manthabiseng, moo re thakhotseng lenaneo la tlhopho-bocha mafapheng a fapakaneng. Ka ho khetholoha re chorisitse maikutlo Molaong oa Motheo oa naha; litsing tsa tšireletso; Paramente; Bosebeletsi ba sechaba; le Makhotla a Boahloli. Tsatsing leo, ke ile ka le hopotsa bohle hore (kea qotsa):

“Morero ona o moholo sechabeng sa Basotho, ’me o tla re fa monyetla oa ho hetla morao ho hlahloba likoti tsohle tseo re ’nileng ra khibela le ho khothometseha ka har’a tsona ka nako e telele re iphetotse mohauhelo oa Machaba;” le ho re fa monyetla oa ho khatha tema e ncha.

Tšepo ea rona ke hore hang ha re kena tšebetsong ena ea bohlokoa ea tlhopho-bocha, bohle re tla itebala borona, re behe Lesotho le Basotho pele ho litaba-tabelo tsa rona re le batho ka bomong. Boipiletso ba ka le thapeli ke hore bohle-bohle re keneng lemong se secha sa 2017 ka moea o mocha, re le ntsoe-leng ho etsa meralo ea tlhopho-bocha eo esale re e laba-labela ho tloha ka 2013 ha moifo oa Maparamente a rona o khutla New Zealand. Ha ho batho ba tlang ho hlaha kante kapa linaheng tsa balichaba ho tla re lokisetsa taba tsa puso ea Lesotho, etsoe namane ea kanyesetsoa e sa hōle; le nakana tsa ho khoesoa li sa tiee, motho a khonoe ke sa ntlo ea hae. Ruri re ka ikhana feela, monyetla oa mofuta ona ha o tle hangata le habonolo paleng ea sechaba sefe kapa sefe. Ha re o sebelisang ka hloko, ho seng joalo re tla lilelang metsotso joaloka thotsela sa 'Melikane.

Basotho ba heso,

Bohle re tla hopola hore e se e le nako e telele joale Basotho ba lla sa 'mokotsane ke litšotleho tseo ba li etsetsoang malibohong pakeng tsa Lesotho le Afrika-Boroa. Hape le tla hopola hore ka 2007 Mebuso ea Linaha tsena ea na ea saenela tumellano ea ho nolofatsa ho tšela malibohong. Ke motlotlo ruri hore kajeno tumellano eo e a sebetsa, 'me ha re bua tjena ke Basotho ba ka bang 180,000 ba entseng likopo tsa ho fumantšoa bolulo Afrika Boroa; 'me ba ka bang 50,000 ba se ba fumane tokomane tseo.

Ho feta moo, ke Basotho ba 1,300.000 ba seng ba fumantšitsoe mangolo a tlhaho, ha ba 720,000 bona ba se ba fumane likarete tsa boitsebiso (tsena tseo Batswana ba li bitsang 'Omang'?). Tšebetso ena ea ho fa sechaba litokomane tsena ke ea

bohlokoa ruri, 'me e tla nolofaletsa baahi ba Lesotho menyetla ea ho fumana libukana tsa ho eta, esita le ho ngolisetsa likhetho, le hona ho fumana lihlapiso le mesebetsi. Ke ntho e ntle 'me e molemo ruri hore Mosotho e mong le e mong a etse ka matla ho fumana litokomane tsena tsa bochaba le boahi ba hae.

Basotho ba heso

Ntumelleng ho thetha polelo ena ka ho boela ke lemosa sechaba sohle phephetso e khōlō ruri eo re tobaneng le eona re le naha ka sekhahla se phahameng sa tšoaetso ea HIV/AIDS le lefuba (TB). Leha e se e le lilemo joale re tsoile letšolo toantšong ea mafu ana ao e leng li-ea-thoteng li-bapile, empa ha ho bonahale katleho hobane sekhahla sa tšoaetso se ntse se phahama. Kajeno Lesotho ke naha ea bobeli lefatšeng ka ho ata ha mafu ana. Ruri ke ipiletsa ho Mosotho e mong le e mong ho nka khato ea ho itšireletsa le ho qoba tšoaetso tse ncha. Leano la mantlha e nts'e le ho etsa kahohle hore motho ka mong a tsebe boemo ba hae malebana le tšoaetso ea mafu ana (**Know your status – KYS**). 'Muso o thakhotse leano le lecha lefatšeng ka bophara le bitsoang '**Test and Treat**' (T.N.T.) Hape re thakhotse leano la Boetapele (Leadership Programme) toantšong ea mafu ana. Ho feta moo, le Lekhotla la Toantšo ea HIV/AIDS (National Aids Commission) le lona le tšositsoe, lea phela, lea sebetsa.

Ke fera ka ho le lakaletsa bohle thabo, khotso le katleho tse tlang le Lesea le belehetsoeng setaleng.

MERRY CHRISTMAS!!

